


Un gran logro pa AVP y e hoben político

Tico Croes a bira Secretario General adhunto di ODCA



Tico Croes

ORANJESTAD - Aruba, pero principalmente Tico Croes y AVP, a logra un éxito internacional na momento cu e hoben político di AVP a wordo nombrá como Secretario General adhunto di ODCA, Organizacion Demócrata Cristiana de América.

Den un combersacion sostení cu Tico Croes, el a manifestá su satisfaccion di no solamente lo representá su partido den un funcion asina halto pero tambe Aruba.

Siman pasá a tuma lugar na San José, Costa Rica, e Consejo di ODCA, cual ta

tuma lugar cada dos aña. E reunion a conta cu no solamente presencia di presidente y vice presidente di e paísnan, pero tabata presente tur e partidonan miembro di ODCA. Por bisa cu tabatin mas cu 75 delegado.

Ratificacion

Hecho importante durante e reunion tabata e ingresion di partidonan grandi di Argentina, Guatemala y Mexico a afiliá nan mes na e organizacion.

Durante e Consejo a keda ratificá tambe e decision di directiva di Consejo pa

apuntá Tico Croes como Secretario General adhunto, y su tarea principal lo ta pa hiba ODCA den Caribe pero tambe pa un mihor envolvimiento.

Croes a splica cu den e último 45 aña ODCA a logra hopi riba terreno di Latino América, pero nan ta carecé di suficiente conocimiento di política interno y regional di Caribe. E decision pa apuntá Croes como Secretario General adhunto di ODCA, pa e trabao di coordinacion, a tuma lugar for di aña pasá caba durante e reunion regional di Caribe cu a tuma lugar na Aruba.

Sorpresa

“Nos tabata sorprendí cu Secretario General a bai mas leu ainda, ofreciendo e funcion di Secretario General adhunto. E hecho aki ta mas sha singular pasobra banda di e funcion di Secretario General tin solamente un puesto cual ta esun di Secretario General adhunto. E hecho cu a duna AVP e Secretaría General adhunto aki, ta haci AVP e di tres partido cu tin importancia den henter e organizacion,” Croes a splica.

E parlamentario di AVP a bisa cu e hecho aki ta un responsabilidad grandi pero ta

yena nan cu orguyo tambe cu esaki ta promé biaha den 45 aña di ODCA cu un persona no Latino a bira Secretario General adhunto.

Hopi preparacion

Croes a bisa tambe cu no ta di un dia pa otro a logra e ariba mencioná. Pa hopi tempo Mr. Hector Gonzalez tabata envolví den e trabao di ODCA y semper a purba di trece padilanti e funcionamiento di AVP. Y ta debí na esaki cu AVP a wordo reconocí den e organizacion pa su trabao organisatorio.

Diabierne siman pasá caba Tico Croes mester a presidí e promé reunion na San José, Costa Rica. A keda aprobá un Plan di Accion. Ademá di esey tambe a ser informá un biaha mas cu AVP, for di April cu a pasa, tabata en cargá cu e “Newsletter” di ODCA (ODCA Informs).

“Ta un honor y un responsabilidad grandi pa cumpli cu e tarea den ODCA,” el a manifestá.

Plan di Accion

E Plan di Accion ta encera cu e político mester bishitá diferente país caminda nan ta nota cu tin un sentimento social cristian y pa trata di trece nan mas cerca di e organiza-

cion y pa nan ta mas envolví.

Algun di e paísnan cu e lo bai bishitá ta Barbados, Bahamas, Jamaica, etc.

E segundo aspecto di e Plan di Accion con ta bai fortificá e comunicacion entre partidonan den Caribe. Y pesey ta pone hopi énfasis riba e “Newsletter”.

Na di tres lugar, e mester busca un manera pa e partidonan cooperá cu otro riba un base práctico. Pa logra esaki pronto lo wordo organizá na Aruba un seminario.

Y finalmente pa demostrá e solidaridad cu pueblo di Haiti, lo bai organizá un reunion na Agosto awor na e país ey.

Mirando e problema cu ta surgiendo atrobe na Sumam, lo bai duna un atencion special pa e proceso democrático y esaki ta nificá cu Croes lo mester bai tene diferente deliberacion na e país ey.

Diferente aspecto programático, aspecto di asercamiento entre partidonan y aspecto di cooperacion práctico entre e partidonan cu e lo mester bai atendé cuné pa sigurá cu e region aki ta un region cu por reflehá e doctrina y ideología social cristian caminda derechonan humano ta keda reconocí y respetá. □